



FACTVM,

POVR M^e Michel le Grand Conseiller du Roy, Vicomte de Laigle.

CONTRE Messire Jacques Antoine de Crux sieur de Corboyer.

TANT de gens sont interessez aux crimes dudit sieur de Corboyer, qu'il est à propos de faire veoir à tout le monde vne partie de ses desordres.

Il est difficile de trouuer vn criminel qui ait offensé le Roy, le Clergé, la Noblesse, la Iustice, & le public : Neantmoins ces funestes auantages se rencontrent dans le sieur de Corboyer, qui a fait vanité de ses actions les plus criminelles.

Le Roy y est intéressé generally par tous les crimes que le sieur de Corboyer a faits, principalement par vne infinité de concussions, & par l'assassinat commis à la Personne d'un Iuge pour auoir rendu iustice, & qui a l'honneur & l'auantage de représenter sa Majesté,

Le Clergé y est intéressé, par ce que le sieur de Corboyer qui est de la Religion prétendue réformée, a tué vn Prestre qui portoit le Saint Sacrement; (& vne Personne de merite qu'on ne nomme pas pour le respect qu'on luy porte, & qui souhaiteroit s'il estoit possible qu'on ne sceut point qu'il sollicité pour l'impunité de tant de crimes si énormes que sa vertu & sa qualité voudroient bien qu'il en demandast luy mesme iustice); Dit pour excuse d'une mort si surprenante, qu'il est vray que le sieur de Corboyer a tué vn Prestre, mais qu'il y a desja quelque tems, & le sieur de Corboyer dit qu'il est vray qu'il a tué vn Prestre, mais que c'est là qu'une bagatelle; ô Dieu quels crimes n'a-t-il donc pas faits?

La Noblesse y est intéressée, puis qu'il a même assassiné des Gentilhommes la force à la main, qu'il a violé les parolles qu'il auoit données dans des accommodemens à des Personnes de condition de ne rien faire à des gens qu'il a tué apres; Et c'est vne honte & vn deplaisir à la Noblesse de voir dans leur Corps vn homme si indigne d'en estre.

Toute la Iustice y est intéressée, puis que ledit Vicomte de Laigle pour auoir iugé vn procès où ledit de Corboyer a crû qu'il y alloit de son preiudice, & pour auoir enjoint à vn Sergent à la requeste d'un pauvre particulier d'assigner à l'Audience ledit sieur de Corboyer; Il auroit conçu vne telle haine contre ledit Vicomte, qu'il l'auroit assassiné de guet à pend sur le grand chemin de Paris à Laigle, & fait tout son possible pour le tuer, Et comme il voit la consequence de ceste action qui regarde Messieurs de la Cour, & generally tous les Iuges du Royaume, qui pourroient estre assassinez par des personnes encores plus puissantes que ledit de Corboyer s'ils n'auoient pas iugé à leur fantaisie, & que si l'on ne pouuoit pas rendre seurement la Iustice, il faudroit abandonner les Charges, & laisser aller tout dans la confusion & le desordre, Il veut ridiculement faire croire que tout ce qu'il en a fait n'estoit que pour faire peur audit Vicomte, mais il est aisé de ~~faire~~ veoir qu'il y va du guet à pend le plus estudié & de l'assassinat le plus noir qui fut iamais: Car ledit de Corboyer ayant obserué le tems que ledit Vicomte partiroit de Paris, & sachant qu'il en deuoit partir le Vendredy apres midy avec les Messagers de Laigle, n'estant party neantmoins à cause de ses affaires que le Samedy

au matin; & le sieur de Corboyer ne l'ayant point trouué sur le chemin, reuint sur ses pas à Villepreu dans l'Hostellerie des quatre Fils, qui est la premiere Hostellerie du costé de Paris, & demanda si le Messager de Laigle y logeoit pas; & y ayant veu ledit Vicomte qui venoit d'y arriuer, il descendit de cheual, fit vn tour dans la salle où il estoit, & apres l'auoir obserué, alla à l'escurie voir son cheual, & ayant veu que ce n'estoit qu'un cheual de Messager comme on luy auoit peu dire, & qu'il n'y auoit point de pistolets, il trouua les choses si disposées pour son mauuais dessein qu'il ne voulut point disner, affin d'estre pres à partir aussi tost que ledit Vicomte, dès qu'il sceut qu'il estoit monté à cheual il enuoya dire que l'on bridast promptement, & dans la pensée qu'il se fust retiré aux Maillets, il l'y alla chercher mais ne l'y ayant pas trouué il monta sur son cheual & piqua apres, & on remarqua si bien à ses actions, à ses parolles & en son visage passe & effrayé du crime qu'il vouloit commettre, le dessein qu'il auoit que tout le monde disoit dans Villepreu qu'il alloit tuer ledit Vicomte; En effet il y fist tout ce qu'il pût, car l'ayant ioint il luy tira d'abord vn coup de pistolet qui manqua, ce qui obligea ledit Vicomte à mettre pied à terre, pour éuiter plus aisement l'autre coup, & ayant dit avec beaucoup de confiance qu'il auoit Dieu pour luy, le sieur de Corboyer eut l'impieté de luy respondre, voyons si tu as Dieu pour toy, & à l'instant luy tira son autre coup qui patrit, & dont le Vicomte fut conserué par l'assistance de Dieu; Mais ledit S^r de Corboyer enragé de n'auoir pas reussy, s'esloigna vn peu, remist de l'amorce au pistolet qui n'auoit point tiré, rechargea l'autre, & regardant si son vallet de Chambre qui n'auoit peu le suiure assés tost venoit, ce qui donna le temps audit Vicomte de remonter sur son Cheual, & de piquer à toute bride au Village de Meray, & le sieur de Corboyer qui ne vouloit pas ~~perdre~~ son occasion le poursuivit le pistolet à la main iusques audit Village, mais n'ayant pû le joindre, il alla à toute bride à trauers champs gagner le chemin de la Queue, & l'on void sur son visage la fureur & le depot d'un homme au desespoir de n'auoir pas executé vn mauuais dessein, & le Vicomte de Laigle ayant fait informer de cet assassinat par le Preuost de Monfort, il decreta contre ledit de Corboyer, l'alla prendre à Laigle, & le mena à Monfort, mais ne l'ayant voulu recognoitre, il appella de la procedure au grand Conseil, & puis au Parlement, & enfin le Priuè Conseil a ordonné que les parties seroient assignées au mois pour le Reglement de Iuges, & que l'instruction sera continuée à la Cour, l'assassinat de la maniere qu'il vient d'estre raporté & qu'il doit l'estre par les tesmoins marque bien l'intention qu'auoit le S^r de Corboyer, & l'on peut iuger par la Requête qu'il a présentée à la Cour s'il est capable de cette meschante action, il a bien l'impudence d'exposer dans vne Requête qu'il presente à vn Parlement, qui est protecteur des autres Iuges, que s'il auoit eu du sujet de se plaindre dudit Vicomte il l'auroit traitté à coups de baston, vn homme qui est assés emporté pour dire à la Cour qu'il traitteroit vn Iuge à coups de baston, que n'est-il point capable de faire dans vn grand chemin, & les menaces qu'il auoit faites auparauant contre ledit Vicomte, sont-ce pas encore des tesmoignages de la funeste resolution dudit Corboyer.

Apres vn assassinat si noir & si auéré commis en la personne d'un Iuge pour auoir rendu Iustice, qu'elle protection ledit Vicomte ne doit-il point esperer de la Cour; Tous les Iuges de la France attendent vn exemple qui les mette en seureté de leur vie, & qui les anime à se bien acquitter de leurs Charges, & à rendre la iustice aux plus pauvres & aux plus foibles, contre les plus riches & les plus puissans.

Le public est interessé aux crimes dudit de Corboyer, puis qu'il ny a point de sorte de gens qu'il n'ait mal-traitez. Peut-on trouuer encore vne action plus lasche & plus cruelle que la mort de Lallemand que ledit de Caboyer assassina dans vn grand chemin, & bien qu'il eust promis à vne personne de condition de ne rendre aucun

desplaisir audit Lallement, si-tost qu'il le vit il deboutonna son manteau, mit l'espée à la main, prist ledit Lallement aux cheveux, & luy donna sur la teste tant de coups de trenchant & de pommeau de l'espée qu'il en mourut dix sept iours apres, Par là on voit la mauuaise foy dudit de Corboyer, & le peu d'assurance qu'il y a sur sa parolle d'auoir tué vn homme apres auoir promis de ne luy faire aucun mal, Et combien de pauures gens a-t-il roüées de coups pour recompenses des seruices qu'ils luy auoient rendus, Il parle dans sa Requête à la Cour qu'il a seruy le Roy dans ses Camps & Armées, & qu'il faisoit rafraichir ses cheuaux pour y retourner, quand il fust arresté, & il est constant qu'il les vouloit vendre au Preuost de Montfort, & qu'on ne la iamais veu faire la guerre que pour luy; Il est vray qu'il a fait de belles conquestes, car presque tout le bien qu'il possède il la gaigné la force à la main, il a battu iusques à la mort vne infinité de malheureux pour auoir leur bien, & outre ses violences on peut dire que c'est le plus ingenieur pour les vfures que l'on vit iamais, Enfin il a fait tant de cruautéz, tant de concussions, tant de meurtres, tant de viols & de toutes sortes de desordres que Monsieur de Marles Intendant à Allençon en a informé, aussi ledit de Corboyer se trouue si criminel que l'on a fait tout son possible pour obtenir son eslargissement de Monsieur le Chancelier, qui est trop iuste & trop prudent, pour l'auoir accordé, Il a bien pensé qu'elle peine & qu'elle despense il a fallu pour prendre vn homme de soixante où quatre vingts mil liures de rente, pour l'amener de Laigle à Montfort de mont~~fort~~ au Fort Leuesque, & que si vn Huissier de la Chaine authorisé d'un Arrest du Conseil n'a ozé le transferer qu'avec quarante hommes du Fort-Leuesque à la Conciergerie, Il seroit impossible de reprendre le sieur de Corboyer qui se tiendroit sur ses gardes; Et qu'il est de consequence de faire le procès à vn homme conuaincu de toutes sortes de crimes, desquels sa Maiesté est informée, & desquels tout Paris & presque toute la France ont conoissance & horreur si le S^r de Corboyer auoit la temerité de demander aussi à la Cour son eslargissement, On pouroit luy faire droict sur le seul Procès verbal de conduite de Laigle à Montfort, où l'on veoit qu'il disoit sur le chemin au Preuost qu'il l'auoit pris sans vert, qu'il estoit le premier Preuost qu'il eust mis la main sur luy, que s'il l'auoit preuenu il n'en seroit iamais venu about, Qu'il auoit des fils, que sa playe seigneuroit long-temps, & qu'il extermineroit ledit Vicomte iusques à la troisieme generation, & bien que les informations qui sont au Greffe de la Cour ayent assés de charge pour faire le procès audit sieur de Corboyer, Elle a ordonné que toute les autres informations faites contre luy, seront apportées au Greffe d'icelle, afin qu'elle mette le procès en estat de faire iustice à vne infinité de personnes interessez dans les crimes dudit sieur de Corboyer, desquels il est demeuré inpuny par le moyen de son argent & de ses amys, Et il s'est rendu si redoutable qu'il y a plus de deux cens tesmoins pres à déposer contre luy qui n'auoient pas l'assurance de dire vne parolle s'il estoit en liberté, Tant de considerations si puissantes font croire que le sieur de Corboyer ne fera pas si temeraire que de pretendre vn eslargissement en quelque maniere que ce soit, où du moins est-on persuadé, que la Cour est trop iuste & trop prudente pour l'accorder à vn homme si criminel.

Monsieur PITHOU Commissaire Rapporteur.

